

Haree kle'an ba Timor-Leste nia ekosistema dijital:

Preparasaun ba nasaun nia kabu internet submariñu dahuluk

Sumáriu Peskiza

Kona-ba peskiza

Timor-Leste besik atu hetan potensialmente mudansa profundo liu ba ninia komunikasaun, kultura no ekonomia dezde nasaun joven ne'e moris iha tinan 20 liubá – ho internet velocidade aas ne'ebé disponivel ba dala uluk ho introdusaun husi Timor-Leste Submarine Cable (TLSSC) ne'ebé tuir planu sei hahú iha tinan 2025 nia klaran^[1]. To'o agora, asesu ba internet ladún di'ak, velocidade ki'ik, no karun.

Peskiza ida-ne'e ho objetivu atu komprende oinsá mak produtór, konsumidór, no parte interesada sira média Timor-oan nian konseptualiza no prepara ba elevasaun konetividade dijital. Estudu ne'e mós haree ba rejiaun Pasífiku atu hetan lisaun saida mak bele aprende husi nasaun sira ne'ebé mak hetan ona konetividade kabu submariñu (iha tasi okos) iha tinan hirak ikus ne'e. Peskiza ne'e explora transformasaun dijital husi pontudevista sira kona-ba informasaun ne'ebé la loos ka dezinformasaun, seguransa dijital, literasia dijital, no konfiansa iha média. Rezultadu sira estudu nian informa rekomendasaun sira kona-ba oinsá parseiru internasionál no lokál sira bele serbisu hamutuk ho profisionál média Timor-oan sira hodi explora oportunidade dijital iminente sira no jere dezafiu sira ne'ebé antisipa ona.

Metodolojia

Estudu ida-ne'e rekolla husi peskiza ABC International Development (ABCID) nian kona-ba Estadu ka Kondisaun Média: Timor-Leste (State of the Media: Timor-Leste), ne'ebé hala'o iha tinan 2023 nia rohan liuhusi kolaborasaun ho The Asia Foundation. Estudu ne'e envolve revizaun ba dokumentu institusionál hamutuk 120 no entrevista semi-estruturadu direita hamutuk 45 ho profisionais média iha média prinsipál sira, governu no comunidade média iha Timor-Leste. Atu habelar deskobrimentu sira no hetan perspetiva rejional, dokumentu no website 90 tan hetan revizaun iha meadu 2024 atu komprende peskiza ezistente relevante iha Timor-Leste no rejiaun Illa Pasífiku. Dadus hetan validasaun ho Konsellu Imprensa Timor-Leste iha Novembru 2024. Peskizadór sira husi Timor-Leste, Austrália, Illa Salomão, no Tonga kontribui ona ba estudu ida-ne'e.



^[1] Bazeia ba dadus terenu nian ne'ebé halibur hosi Sekretáriu Estadu ba Komunikasaun Sosiál (SECOMS) iha Novembru 2024

1. Konetividade ne'ebé aumenta hamosu oportunidade nomós dezafiu sira

Respondente sira iha esperansa katak aumentu iha konetividade dijitál sei lori kustu dadus ne'ebé ki'ik liu. Adisionalmente, ho média Timor-oan sira ne'ebé maioria sentralizadu iha kapitál Dili, antisipa katak aumentu konetividade sei permite kolaborasaun boot liután entre profisionál média urbanu no rurál/rejionál sira. Kapasidade atu aumenta audiénsia sira no hetan reseita online foun sira mak benefísiu poténsiál sira seluk ne'ebé notavel. Iha mós aspirasaun katak Timor-Leste sei bele haburas nia prezensa globalmente no iha rejiaun ASEAN ho konetividade dijitál ne'ebé boot liu.

Maibé, respondente sira nota katak forsa traballu média nian seidak iha abilidade no matenek ne'ebé presiza atu aplika no mantein sistema no ekipamentu sira ne'ebé asosiadu ho internet ho velocidade aas. Limitasaun sira iha literasia média nian sai ona dezafiu ida bainhira hasoru nivel atuál sira husi informasaun sala/dezinformasaun; antisipa ona katak importánsia husi ida-ne'e sei aumenta de'it bainhira asesu ba internet aumenta. Respondente sira mós mensiona katak ho konetividade ne'ebé maka'as, sei presiza lei sira kona-ba seguransa sibernética, krime sibernética, no protesau dadus ne'ebé maka'as liután, akompaña ho sistema no abilidade sira atu jere nesesidade ka kestaun sira ne'e.

2. Aprosimasaun "hein no haree"(wait and see) ba planeamentu impaktu kabu nian

Peskiza indika katak média Timor-oan, no sosiedade enjerál, barak liu adota aprosimasaun 'hein no haree' hodi rezolve impaktu sira husi aumentu konetividade internet nian. Iha momentu halibur dadus (Agostu 2024), diskusaun kona-ba kabu submariñu la mosu iha dokumentu públiku sira no mós la hato'o ho orgániku ka naturalmente husi respondente peskiza sira. Iha konxiénsia uitoan de'it ne'ebé hatudu kona-ba saida mak konektividade di'ak sei involve, inklui nia impaktu iha setór média ka enjerál. Enkuantu benefísiu ekonómiku sira ne'ebé antisipa ka hetan husi konetividade internet ne'ebé aumenta hetan rekoñesimentu uitoan, benefisiu sira ne'e la konsidera ho kle'an.

3. Evolusaun dijitál akontese daudaun ona iha Timor-Leste

Wainhira uza internet ne'ebé neineik no la konfiável, Timor-Leste nia populasaun barak ne'ebé joven no urbanu ba bebeik dezenvolve ona aprosimasaun kreativu no determinadu hodi produz no asesu ba konteúdu online. Website jurnalizmu online baze nian mosu ona no sira iha istória kapás (track record) ba reportajen feature no investigativu. Podcast independente sira no tranzmisaun diretu mak karakterístika ka fitur foun sira husi paizajen média nian, enkuantu média tradisionál sira mós uza ona plataforma online sira ba diseminasaun no envolvimentu. Maske iha dezafiu sira relasiona ho seguransa online no informasaun sala/dezinformasaun, peskiza hatudu katak joven sira barak liu konsideradu no kuidadu iha sira-nia interasaun online, hodi konsidera norma comunidade no kulturál sira.

Treinamentu no inisiativa oioin husi governu nasional, konsellu imprensa, no ONG internasionál no lokál sira mós hala'o ona iha tinan hirak ikus ne'e hodi apoia literasia dijitál no hasoru dezafiu sira ne'ebé relasiona ho internet.

4. Peskiza konetividade dijital ne'ebé domina husi organizasaun internasionál sira

Peskiza sira ne'ebé aborda kestaun dijital sira iha Timor-Leste, no enjerál iha rejiaun Pasífiku tomak, barak liu produz, ka hetan apoiu, husi entidade internasionál sira. Rezultadu sira-ne'e normalmente badak, dala barak kompostu husi apresentasaun sira iha formasaun ka konferénsia nian. Ida-ne'e indika dezekilibru poder estruktural iha peskiza no análise; Ida-ne'e mós afirma iha ezemplu raru sira husi investigasaun akadémiku sira ne'ebé kle'an, ne'ebé mós hala'o husi peskizadór ka entidade internasionál sira.

5. Komprensaun diferente sira kona-ba Informasaun sala/dezinformasaun no literasia dijital impede kolaborasaun

Iha diferénsia signifikativu entre oinsa parte interesada internasionál no lokal sira define no diskute konseitu sira relasiona ho informasaun sala (falsu) no dezinformasaun (misinformation and disinformation), ho Timor-oan sira refere ba konseitu sira-ne'e iha ekosistema ida ne'ebé luan liu kona-ba dezafiu sira ne'ebé relasiona ho internet. Respondente Timor-oan sira ladún uza termu misinformasaun no dezinformasaun, sira prefere uza 'hoax' (ne'ebé komún mós iha Indonézia) nu'udar termu ne'ebé kobre hotu ba Informasaun sala/falsu, fabrikadu (inventu) ka laloos. Termu seluk ne'ebé foti iha diskusaun hanesan mak Trata Malu (abuse and insult) no Diskursu Odiu (hate speech). Iha potensiál ba kolaboradór lokal no internasionál sira atu komprende sala malu bainhira serbisu iha inisiativa sira atu rezolve misinformasaun no dezinformasaun (mis and disinformation).

Dezafiu sira ne'ebé hanesan eziste hodi hetan definisaun ida ne'ebé klaru kona-ba literasia dijital ne'ebé dala barak uza hanesan solusaun ka mitigasaun ba dezafiu sira kona-ba misinformasaun/dezinformasaun no seguransa dijital. Komprensaun sira kona-ba literasia dijital varia iha kontestu sira ne'ebé relasiona ho formasaun média, edukasaun eskolár, literasia dijital finanseira, no peskiza akadémika.

6. Lisaun rejional sira kona-ba infraestrutura dijital no konetividade

Bazeia ba esperiénsia dokumentadu sira ne'ebé hasoru husi Nasaun sira Illa Pasífiku nian ne'ebé sai pioneiru ba utilizasaun kabu internet iha bee okos (submariñu), hetan katak konetividade kabu mesak de'it la garante asesu dijital ne'ebé ho kustu-efetivu no sustentável. Nasaun sira hanesan Illa Salomão no Papua Nova Guiné (PNG) la haree mudansa iha presu dadus nian hafoin kabu liga ona. Ida-ne'e, iha parte ida, tanba kustu aas ne'ebé akumula hodi finansia kabu sira ne'ebé afeta presu konsumidór nian.

Internet lalais liuhusi 5G sai nafatin esepasaun iha rejiaun Pasífiku, ho nasaun sira fó prioridade ba 4G no 3G hanesan opasaun realístiku liu no kompativel ho ekosistema dijital sira ne'ebé eziste. Esperiência sira iha Pasífiku hatudu mós katak enkuantu kabu sira mak parte krusial ida husi 'etapa primeiru' (first mile) husi konetividade, sira la taka divizaun dijital sira ne'ebé kauza husi lakuna sira iha konetividade 'etapa médiu' (middle) no 'etapa ikus' (last mile).

7. Falta iniciativa sira ne'ebé identifika ona hodi kombate violénsia bazeia ba jéneru online

Laiha evidénsia kona-ba iniciativa programátiku sira ne'ebé haree ba violénsia bazeia ba jéneru online (VBJO) ne'ebé hetan husi traballadór média sira iha Timor-Leste. Maibé, respondente sira hatudu VBJO hanesan kestaun signifikativu ida ne'ebé mak sai preokupasaun husi jornalista feto sira, ne'ebé mai husi norma sosiedade patriarkál sira.

Peskiza iha nasaun viziñu Indonézia no Illa Pasífiku sira afirma katak VBJO nu'udar kestaun signifikativu rejionalmente, ne'ebé presiza investigasaun iha Timor-Leste liuliu iha melloramentu konetividade ne'ebé sei akontese.

Rekomendasaun Xave sira

Kumulativamente, peskiza ida-ne'e indika ba nesesidade ba esforsu sira atu garante katak lakuna koñesimentu sira iha kabu submarinu nian prenxe, no katak definisaun no análize sira kona-ba tópiku sira hanesan mis/dezinformasaun no literasia dijitál, desenvolve, fahe, no adota iha maneira sira ne'ebé responde ba Timor-oan sira-nia preokupasaun no esperiénsia sira. Esforsu sira relasiona ho asuntu sira-ne'e sei presiza envolve kolaborasaun no konsulta ho autór no parte interesada prinsipál sira Timor-oan nian, hodi konsidera presaun tempu no rekursu sira ne'ebé sira hala'o daudaun ona.

Nesesidade xave ida mak parese atu komunika saida mak kabu submarinu bele ka labele fornese ba velocidade konetividade no kustu dadus, posivelmente foti husi esperiénsia oioin hosi Nasaun sira Illa Pasífiku nian hodi asegura espetativa sira no preparasaun ruma iha baze loloos.

Estudu ne'e halo parte iha Programa Dezenvolvimentu Mídia Timor-Leste ne'ebé implementa husi ABC International Development (ABCID) tuir Estratéjia Tranzmisaun Indo-Pasífiku Governu Austrália nian.

Deklarasaun: Pontu-de-vista sira ne'ebé representa iha relatóriu ida-ne'e mak sira ne'ebé mai husi autór sira no partisipante peskiza nian no la nesesariamente reflete pontu-de-vista sira hosi Governu Austrália, Korporasaun Radiodifusaun Austrália ka The Asia Foundation.

